


TEZAUUR LITURGIC

7 IUNIE

SLUJBA SF. IERARH IOANICHIE RUDNEV, MITROPOLITUL KIEVULUI



MOSCOVA, 2000



Месяца июня в 7-й день Служба святителю Иоанникию, митрополиту Киевскому

На велицей вечерни

На Господи, возвах: стихирь, глас 8:

Приидите, людие Божии, / воспоим архиерея
Христова Иоанникия / и припадем к раце его
нетленных мощей, / той бо на кафедру
святителей Киевских возшед, / ревностное по
Бозе житие явил еси, / светом веры на путь
правый паству свою наставляя // и манною
евангельскаго учения непрестанно ю питаея.
Христова иерарха воспоим вси Иоанникия, /
яко крины душ человеческих в вертограде
Киевстем добре возрадившаго // и проповедию
слова Божия обильно я оросившаго.

Благочестию евангельскому обучился еси,
богодуховенне Иоанникие, / и помазався Духа
помазанием святым, / священнодатель
блаженнейший был еси, / пастырь истинен и
веры поборник: / темже вся Церковь Киевская
славит твою память, // похвалы глаголющи и
Спаса прославляющи.

Слава, глас тойже:

Красуйся и ликуй, Церковь Киевская, / память
празднующе святителя Иоанникия, / небеса

радуйтесь, Ангела новаго приемлюще, /
милостиваго нашего заступника // и в духовнем
житии крепкаго споручника.

И ныне, Богородичен: Царь Небесный:

Вход. Прокимен дне. И чтения 3 святительская.

На стиховне стихиры, глас 5:

Радуйся, наставниче достойный юношей
христианских, / ума чистоту и мудрость велию
стяжавши, / просвещаше я ведением Троицы
Единосущныя и Нераздельныя / и научаше
преданности Церкви Божией, / дабы изшедше
на стезю проповеди евангельской, // со
дерзновением прославляли Отца и Сына и
Святаго Духа.

Стих: Дивен Бог во святых Своих, Бог Израилев.
Радуйся, святителю отче Иоанникие, / ибо Бог
тя возвеличи, поставив епископом Церкви
Своея, / ты же жребий служения сего яко волю
благую Его восприим, / присно ревноваше о
славе // Троицы Единосущныя и Нераздельныя.

Стих: Святым, иже суть на земли Его, удиви
Господь вся хотения Своя в них.

Радуйся, свеща пресветлая Богом возженная, /
благочестием и милосердием искренне сияющая
/ и на свещнице митрополии Киевской
премудро поставленная, / святителю Христов

Иоанникие, / молися о нас присно, // память твою совершающих святолепно.

Слава, глас 8:

Ты еси пастырь добрый и учитель теплый, святителю Иоанникие, / тя всегда похваляюще вопием: / тобою Бог украси церковь Свою, / и тело твое многолетно покровенное в земли, / нетленно яви людем Своим. / Темже не престай моляся о чтущих святую память твою, // проси оставления грехов, и спасения душам нашим.

И ныне, Богородичен воскресный: Безневестная Дево:

Тропарь, глас 3:

Вернаго архипастыря Христова, / церковнаго священноначалия украшение, / придите, вернии, восхвалим святителя Иоанникия, / неумоимаго проповедника, благочестия блюстителя // и паствы своея приснаго печальника и просветителя.

На утрени

На Бог Господь: тропарь святаго дважды, глас тойже. Слава, и ныне: Богородичен, глас той же.

По 1-м стихословии седален, глас 8:

Непостижимый Свет от Света — Христос Господь в тебе, святителю, почивает и, яко

свещу пресветлую, ты миру являешь, да посреде народа Божия святым житием блистаеши и лучами учения евангельскаго его озаряеши: темже светло празднуем память твою, преблаженне Иоанникие.

Слава, и ныне, Богородичен:
Богорадованная Владычице, святителем удобрение, праведным утверждение и всем преподобным похвало, спаси от бед, скорбей и лютых прегрешений верою воспевающия тя.

По 2-м стихословии седален, глас 8:
Яко солнце светлое, возсия честная память святителя Иоанникия, освещающи и согревающи сердца наша, паче же призывающи подражати житию его и ревности о вере.

Слава, и ныне, Богородичен:
Дево всенепорочная, пресущнаго Бога рождшая, со святителем Иоанникием Того непрестанно моли, оставление прегрешений и исправление жития прежде конца даровати всем, верою и любовью ко твоему милосердию прибегающим.

Величание:

Величаем тя, / святителю отче Иоанникие, / и чтим святую память твою, / ты бо молиши за нас / Христа, Бога нашего.

По полиелеи седален, глас 5:

Над страстьми царствовав плотскими, /
святитель явился еси богоподобен, / и паству
твою Киевскую преславно упасл еси, Иоанникие:
/ словом Божиего благовестия питая, /
отеческим участием нужды и скорби ея облегчая
/ и в молитвах пред престолом Божиим за ню
вопия: аллилуиа.

Слава, и ныне, Богородичен, глас тойже:
Пресвятая Богородице дево, / попомилуй нас,
прибегающих к Тебе с верою / и просящих
теплаго Твоего заступления: / можеши бо, яко
благая, всех спасти матерними Твоими
молитвами.

Степенна, 1-й антифон 4-го гласа.

Прокимен: Уста моя возглаголют премудрость, и
поучение сердца моего разум.

Стих: Уста праведного поучатся премудрости, и
язык его возглаголет суд.

Евангелие святительское.

По 50-м псалме стихира, глас 2:

Придите, вернии, воспоим / служителя
Христова прехвальнаго, / архиерея Божия
премудраго, / пастыря Церкви истиннаго, / и
велегласно ему возопиим: / помяни стадо твое,
присно чтущее тя, // святителю отче
Иоанникие.

Канон, глас 8, егоже краегранесие сие:
Славлю святителя Христова Иоанникия.

Песнь 1

*Ирмос: Воду прошед яко сушу, / и египетскаго
зла избежав, / израильтянин вопияше: //
Избавителю и Богу нашему поим.*

Припев: Святителю отче Иоанникие, моли Бога о нас.

Святителю Христов Иоанникие! Умоли милостиваго Создателя даровати ми ум и язык, да воспою по достоянию служение твое на ниве Божией.

Лик святительский, тобою зело обогатився, прилежно молится о нас ко Господу, да возгоримся духом и песньми возвеличим блаженнаго Иоанникия.

Апостолов преемника и святителей Киевских сопрестольника воспоим, вернии, и поклонимся Пастыреначальнику, таковаго нам предстателя даровавшего.

Богородичен: Воплотитися из Тебе,
Преблагословенная Марие, и совершенным
Человеком стати изволил есть Спаситель мира,
Егоже моли просветити сердца и спасти от бед души наша.

Песнь 3

*Ирмос: Небеснаго круга / Верхотворче, Господи,
/ и Церкви Зиждителю, / Ты мене утверди в
любви твоей, / желаний краю, верных
утверждение, // Едине Человеколюбче.*

Любовию ко Христову просвещению от юности уязвися, в Киевския духовныя школы притекл еси, идеже на крилах прилежания и смирения к высотам премудрости Божия вознесся еси. Юности цветение в жертву владыце Христу принося и мечем любомудрия терние страстей своих посекая, шипок краснейший явился еси. Со страхом Божиим послушания различныя проходя, и архиерейскаго служения послушание, от Церкви тебе преданное, смиренно восприял еси, ничтоже вопреки, токмо «Да будет воля Твоя», глаголя.

Богородичен: Восхвалити и воспети да сподобиши, Владыко, божественный храм Твой — Святую Деву, ныне со святителем Иоанникием за ны молящуюся.

Седален, глас 2:

Во святительстве благочестно пожил еси, архиерею богоявленне, люди к богоразумию словом и делом наставил еси, и Богу до конца угодил еси. Сего ради от Него нетлением, отче

Иоанникие, почтился еси, яко причастник
Божия благодати.

Слава, и ныне, Богородичен:
Всех святых, от века Богу благоугодивших,
похвала ты еси, Пречистая. Темже с сонмом
мучеников, пророков, апостолов, иерархов и
преподобных молися ко Господу, да спасет души
наша.

Песнь 4

*Ирмос: Ты моя крепость, Господи, / Ты моя и
сила, / Ты мой Бог, Ты мое радование, / не
оставль недра Отца / и нашу нищету посетив.
/ Тем с пророком Аввакумом зову Ти: // силе
Твоей слава, Человеколюбче.*

Якоже пастиря добраго избра тя Христос, да
упасеши стадо Его, тебе врученное, на пажитях
живоносных учений.

Тя, яко творца и основателя многоразличных
начинаний добрых, чтит Святая Церковь и всех
верных взывать тебе научает: радуйся,
святителю Христов блаженне.

Истинен и верен страж дому Божия явился еси,
паству свою от раскола деятельно ограждая и
заблудших на путь правый пламенным словом
обращая.

Богородичен: Тебя, Пречистая Дево, со
святителем Иоанникием ныне ублажаем и

прилежно вопием: Пресвятая Богородице, спаси нас.

Песнь 5

Ирмос: Вскую мя отринул еси / от лица Твоего, Свете Незаходимый, / и покрыла мя есть чуждая тьма, окаяннаго, / но обрати мя и к свету заповедей Твоих // пути моя направи, молюся.

Елеем добрых дел, святителю отче Иоанникие, наполнил еси архиерейский светильник свой, отеческую попечительность о призрении и воспитании сирых и убогих имеа.

Лик духовный составльше, вернии, воспоим блаженнаго Иоанникия, иже труды многими житие народа Божия устрояя, славу милостиваго святителя стяжал еси.

Явиша Господь дивный промысел Свой, егда благодатными дарами Духа Святаго тя многообразичне помаза, да возможеша право правити слово Божия истины.

Богородичен: Ходатаица за род человеческий пред Спасителем неутомимая, двери милосердия Твоего отверзи нам, в духовных болезнях сущим, и врачевством Твоея молитвы исцели.

Песнь 6

Ирмос: Очисти мя, Спасе, / многа бо беззакония моя, / и из глубины зол возведи, молюся, / к Тебе бо возопих, и услыши мя, // Боже спасения моего.

Рукою своею, святителю Иоанникие, сам Господь священнодействовал, егда отверзаше ея для сирот малолетних и дев-отроковиц, для юношей-семинаристов и престарелых иереев. Темже и нам подай от молитвенных щедрот твоих.

Иверския земли экзархом поставлен быв, истое попечение о судьбах народа сего явил еси, духовное просвещение насаждая и церковную жизнь повсюду устрояя.

Страстей Христовых силу и значение разумея, основал еси Братство Святаго Креста, во еже церковныя нестроения преодолети и заблудшие души из раскола к духовному общению обратити.

Богородичен: Тя, Пресвятая Владычице, усердно призываем: пристанище буди нам, треволениями житейскаго моря гонимым и водительство к чертогам небесным.

Кондак, глас 8:

Избраннаго тя светильника Церкви Божия / вознесе Господь на престол града Киева, /

идеже правдолюбием бесстрастным, /
попечением отеческим и любовью сердечною /
славу духовную стяжал еси. / Темже, на
нетленные мощи твоя взирающе, воспевает
сиче: / Радуйся, отче Иоанникие, // града
Киева преславный святителю.

Икос:

От юности взем крест твой, искренне Христу
последовал еси и, от силы в силу возрастая, на
престол митрополитов Киевских возшел еси.
Помози и нам, чадом твоим, мудрость духовную
от Бога стяжати, непрестанное попечение о
спасении души возыметь, тебе же молитвенно
возопити:

Радуйся, небесе церковнаго звездо
новоявленная;

Радуйся, земли нашея похвало нетленная;

Радуйся, всех скорбящих и во обстоянии сущих
скорый и молостивый утешителю;

Радуйся, благий наш и верный предстателю;

Радуйся, отче Иоанникие, града Киева
преславный святителю.

Песнь 7

*Ирмос: Божия снизхождения / огонь устыдися в
Вавилоне иногда: / сего ради отроцы в печи
радованною ногою, / яко во цветнице ликующе*

пояху: // благословен еси, Боже отец наших.
Оскудением благочестия в народе Божиим терзаяся, многоплодным житием своим увещеваше священницы не токмо словесы, но и дела душу свою непрестанно за чад полагати. Возсиявше в лице святителей, премудре, предстоиши ныне со ангелы неприкосновенному Царю, темже совершающим священную память твою помолися оставление грехов даровати. Адамант веры тверд и некрушим явил еси житием твоим, святителю Иоанникие. Помози и нам, пред нетленными мощами твоими колена преклоняющим, таковую веру от Бога стяжати. Богородичен: Излияся на Тя, Пресвятая Богородице, свет неизреченный благодати Духа Святаго, и Слово плоть бысть, Егоже со святителем Иоанникием умоли бездну прегрешений наших простити и исполнити веселия сердца наша.

Песнь 8

Ирмос: Седмерицею пець / халдейский мучитель / Богочестивым неистовно разжже, / силою же лучшею спасены сия виде, / Творцу и избавителю вопияше: / отроцы, благословите, священницы, воспойте, // людие, превозносите во вся веки.
Овладе тобою ревность о славе Божией, егда Дух

Святый ты в чин святительский возведе. И ныне, любовь ко Христу в молитве пламенея, помолися и о нас, дабы на поприсе жития сего не овладели нами вражие озлобление и уныние. «Аще кто хочет по мне идти, да отвержется себе, и возмет крест свой, и по мне грядет». Сии словеса в житии исполнив, Архиерея истиннаго подобник явился еси, темже с любовью пение чад твоих прими и благия желания сердец наших исполни.

Новаго молитвенника в тебе, святителю Иоанникийе, боголюбивый православный народ обрете, темже не престай ходатайствовати пред Богом о Киевской пастве, твою память празднующей светло.

Богородичен: Ненаветно шествовати стезею богоугодных деяний даждь нам, Богоневестная, яко да твоим, Дево, заступлением, злокозненнаго пути уклоньшися, присносущныя славы общницы будем.

Песнь 9

Ирмос: Ужасеся о сем Небо, / и земли удивишася концы, / яко Бог явися человеком плотски / и чрево Твое бысть пространнейшее Небес. / Тем Тя, Богородицу, // Ангелов и человек чиновачалия величают.

Изобилуя в добродетелех всяческих, святителю

Иоанникие, подаждь и нам от духовных щедрот твоих и научи прочее время живота нашего не всеу, а в деятельном служении Христу Спасителю проводить.

Кормчий добрый буди мне, святителю Иоанникие, и ко спасению души утлый кораблец жития моего направи, да узрю землю обетованную и в тихое пристанище Царствия Небеснаго вниду.

Иссопом молитвы архиерейския окропи всех приступающих к раце честных мощей твоих, да чистым сердцем, притрепетною мыслию и душою сокрушенною воспоим Троидинаго Бога, во святых Своих дивно прославльшагося.

Богородичен: Явилася еси превысшая всякаго естества ангельскаго, Пресвятая Богородице Дево, егда Бога плотию зачала еси, сподоби и нас превыше всякия греховныя страсти вознестися и неизреченныя духовныя радости о Воскресшем Спасителе сподобитися.

Светилен, глас 3:

В песнех восхвалим светило земли Киевския, / таинника Христа, / его же Божественное Слово просвети и возлюби, / и помощника нам ко спасению дарова.

Слава, и ныне, Богородичен:
Милости Твоя, Владычице, к земли Киевской кто
витийством словес достойно воспети возможет,
точию усердно молим Тя, Царице: прости нас,
грешных и немощных, воистину сердечно Тя
почитающих.

На хвалитех стихиры, глас 8:
Священную твою память совершаем, / яко
вернаго служителя Божия и наставника
преславнаго тя чтуще. / Темже гимном
молитвенным и песньми духовными тебе,
святителю Господень Иоанникие, празднуем, /
славяще Христа во веки. (Дважды)
Дарований божественных сосуд быв, блаженне,
/ от благодати твоея коемуждо просящему
радостно подаваше, / научи и нас сосуды душ
милосердием к ближним наполняти / и делами
благочестия Спасителя прославляти.
«Не нам, Господи, не нам, но имени Твоему
даждь славу», / — по вся дни священнослужения
взывая, / житие твое, яко жертву благовонну,
Богу принесл еси. / Молися о совершающих
святую память твою, / да внидет и в наша
сердца ревность о славе Божией.

Слава, глас 2:
Придите, вернии, воспоим / служителя
Христова прехвальнаго, / архиерея Божия

премудраго, / пастыря Церкви истиннаго, / и
велегласно ему возопиим: / помяни стадо твое,
присно чтущее тя, / святителю отче Иоанникие.

И ныне:

Спаси от бед рабы Твоя, Богородице Дево, яко
все по Бозе к Тебе прибегаем, яко к нерушимей
стене и предстательству.

[Полиелейная служба святителю Иоанникию
Рудневу, митрополиту Киевскому и Галицкому,
составлена преподавателем Киевских духовных
школ **протоиереем Олегом Кожушным**]

